

## 府城詩鈔

### 七言古體

#### 府城鳳凰花詩

梅蕊凌寒萎夏初，芙蓉淨雅賴池居；酷陽不改真情性，唯獨此君長晏如。  
立身豈待俗人攀，枝幹軒昂碧漢間；街市從容斜日暮，南風婉轉落花閒。  
異域移來誰與同（註），灼灼千株萬朵紅；問君何學州官意，直欲燃火滿城中。  
緬思畢業猶青衿，鳳凰花樹已成林；花開花落多少事，教人思念到如今。

※註：鳳凰花原產於非洲馬達加斯加島，日治時期由日人引進台南廣為栽植，現為台南市市花。

#### 中秋夜宴寄英國友人

蟾宮轉輪瑩如玉，天起金風催金菊；我有嘉賓夜吹笙，金樽須滿春水綠。  
良辰豈可匿華屋，朱閣綺戶猶侷促；未及暢懷登郊邱，月下雅筵更清淑。  
慚居都市長庸碌，難學大隱意幽獨；浮生若得伴閑情，身在塵俗便絕俗。  
君在海外飛鴻鵠，今宵團圓少親睦；嬋娟有晴雖憐人，千里相思哪可蹴。

### 五言古體

#### 時事有懷

寶島榮華地，屹立三百年；蕞爾休輕視，海隅自卓妍。  
時氣暖風候，耕植可順天；曾譽淹腳目，遍地皆金錢。  
蕭條時代異，富貴散雲煙；幾多中人家，流離在路邊。  
路邊長辛苦，饑寒不得春；討索求一飯，得餽亦足珍。  
凍餒誠難守，為娼亦笑貧；偷竊徒溫飽，此昔皆良民。  
學生富家子，包子猶土塵；棄皮僅食肉，焉聞餓死人。

### 七言律詩

#### 夕遊安平

四草橋聞潮湧聲（註），海風迎送入安平；老街近訪成新寵，今世遙思是古城。  
衢肆紛綸宜眾樂，坊隅窈窕好孤行；斜陽珍重遊人意，不改餘暉依舊晴。

※註：即四草臨海大橋，為通往安平的主要道路之一。

#### 七夕逢雨二首

##### 其一

牽牛織女望迢迢，恨到星河失鵲橋；雲際長時憐夜短，天涯近處怯情遙。  
曇花有意難終夕，草露無心僅一朝；世事紛紛常似此，愁憑杯酒不能消。

## 其二

七夕寒蟾光未明，霖霖洗卻夜彌清；鵲橋銀漢應無限，天上人間自有情。  
輾轉相思心萬里，徬徨獨坐雨三更；用情深處須長樂，莫把閒愁對酒傾。

## 2011年台南燈會

綵燈明月競奢華，燈自森羅月自斜；火樹燎空千錦繡，花車鬧市萬人家。  
龍吟絲竹揚清樂，鳳尾伶優舞落霞；有景良辰須似此，行春不用到天涯。

## 新年贈友

君亦多憂如杞人，朱顏豈獨與誰親；三驚鏡像顏雖老，一換桃符歲正新。  
徒惱去年毛底雪，更珍來日手頭春；寧思逝者能追否，更計今時勝往塵。

## 秋臨赤崁樓

颯颯秋霖灑碧空，畫樓疏柳倦西風；四周亭榭風塵外，五代繁華煙雨中（註1）。  
稜堡撫思當日事（註2），龜碑銘記昔時功（註3）；王圖霸業皆烏有，千古江山感慨同。

※註1：五代：赤崁樓經「荷蘭」、「明鄭」、「清朝」、「日治」、「中華民國」故稱五代。

※註2：稜堡：即普城稜堡，為荷蘭時期堡壘遺址。

※註3：龜碑：為乾隆御賜勳勳碑，位於赤崁樓正樓前，記載福康安平定林爽聞事件之功。

## 遊棲蘭森林遊樂區

還憶員山昨夜過，今晨陟岳未蹉跎；峭巖迎旭塗金粉，古木攬霄垂綠蘿。  
徑繞猿啼聲宛轉，峰浮雲海影婆娑；可憐嵐霧心猶吝，不欲人窺隱豹多。

## 佳節有感

月掛幽簾燈色疏，拂牆花影上庭除；共憐佳節無遙地，孤讀清宵有好書。  
雲釋星辰當璀璨，心乘鴻鵠莫躊躇；肩擔道義陳風骨，至此男兒是丈夫。

## 2010年偕友人平溪點天燈，臨別而作。

元夜清寒未寂寥，平溪好趁鬧元宵；山城旖旎春華近，燈影參差星夢遙。  
冀願拳拳同昨歲，風塵僕僕奮明朝；異鄉遊子勤相勉，莫類秋蓬任轉飄。

## 過孔廟

下馬碑前第幾人（註），大成殿內復秋春；嘗嗟時薄應無道，不嘆德孤還有鄰。  
論語立言垂典範，陶甄宏教育黎民；泮池空映閑雲月，誰效先賢知采芹。

※註：下馬碑：立於孔廟廟前，上書「文武官員軍民人等至此下馬」滿漢文字，以示對孔聖的尊重。

### 遊京都二條城（註）

獨挈奚囊訪舊京，東風駘蕩二條城；松環金闕凌朝日，柳蔭玉階啼曉鶯。  
鳳閣一春飄絮影，龍庭盡日落花聲；王侯將相今安在，滿目芳菲誰更爭。

※註：二條城：位於日本京都二條城町的城堡，建設於江戶時代初期。曾為德川家康的寓所，現為世界文化遺產。

### 大學同學會戲作

囑語君當怨醉人，交觥一飲莫違春；世情迷入惺忪眼，醞醖醺沾諧謔唇。  
笑裡休論身後事，樽前且樂醉中真；萬般如酒穿腸過，囑語君當怨醉人。

### 台南東城門

古蹟坐憐街景尋，城樓誰復此登臨；百年丰雅懷新舊，一瞬榮華感古今。  
碧樹煙籠風細細，黃雲日隱韻沉沉；曾聞紫氣來東處，駐望東安盼好音（註）。

※註：東安：台南市東城門之名。

### 春日火車誤點

楊柳東風裊碧絲，月臺久候自微詞；豈因寤夢行猶緩，恐為憐春來較遲。  
杳似梨雲依幾處，甘如杏雨待何時；班車爭忍流光誤，悵對青陽有所思。

### 三月三日夜遊吳園（註1）

叩得朱門一笑開，芳園此處築蓬萊；咸看富貴浮雲去，獨賞風流騷客來。  
瑰麗春光新氣象，依稀花月舊池臺；飛來峰景清幽色（註2），更許凡人遊幾回。

※註1：吳園：為明鄭時期府城鹽商吳尚新所建，百年前與板橋「林家花園」、新竹「北郭園」和霧峰「萊園」被列為台灣四大名園，現與台南公會所合併，傳統建築僅存一隅。

※註2：飛來峰：吳園仿飛來峰之假山庭園造景，假山中有曲徑景色清幽，為吳園一大景點。

## 七言絕句

### 安平古砲台

古砲雜塵鐵鏽生，漆新無復見豪情；何曾顧惜當年勇，唯願人間永太平。

### 乙酉初春大寒聞雪而作

時逢伏臘倍風酸，朔氣吹鹽上合歡。來往人人傳雪瑞，誰知今夜幾人寒。

### 讀王荊公「明妃曲」

初送昭君驚艷時，畫工雖殺已爲遲。幾多佳麗愁眉黛，尙誤深宮人不知。

### 台南紅葉公園漫遊

碧樹凋黃蘆白頭，寒山獨往欲消憂；一秋看盡丹楓色，擬把深愁換淺愁。

### 草山行春

玉樹瓊花照眼新，更知身後是凡塵；草山春色原無賴，佔盡東風不讓人。

### 詠炭

遍身汗黑豈憂艱，烈焰燒焚若等閒；但與飢寒冬送暖，何求清白在人間。

### 秋過白河

凋盡芳榮意始深，枯蓬採子萬叢尋；塘泥不染清芬質，誰解其中有苦心。

### 媒體

媒體紛紛似亂雲，燎如野火半天燠；太阿雖利持顛倒，成事緣君敗亦君。

### 公門

公門列位好修行，自問幾人修得成；勤政不趨諛貴顯，肯憐身後好聲名。

### 秋月

剪剪金風萬里長，高樓邀月欲何方；清輝染就相思色，一夜思人思故鄉。

### 聽「望春風」

短檠搖燭影猶單，入夜春風容易寒；心寄琵琶弦外曲，相思欲說總爲難。

### 夏日

高樹蟬嘶徒費聲，莎鷄虛織自無成；何如簷角蜘蛛巧，網得飛花一院晴。